

Corporaziun Evangelica Zernez

Protocol radunanza 19/1

Radunanza generala da marcurdi, ils 24 avrigl 2019, a las 20.15, in sala da pravenda catolica a Zernez.

Preschaints: 40 persunas cun dret da vuschar

S-chüsats: Barbara e Jörg Luzi, Arno Felix, Ricardo Weingart

Tractandas

1. Tscherna dals scrutinadurs
2. Protocol da la radunanza generala a Zernez dals 18 avrigl 2018
3. Rapport annual da la presidenta 2018
4. Deliberaziun d'ün credit posteriur per las renovaziuns da l'abitaziun a Lavin
5. Rendaquint 2018 e rapport dals revisurs da quint
6. Fixar il pè d'impostas da la baselgia per l'on 2020
7. Preventiv 2019
8. Tschernas: Elecziun d'ün president
Elecziun d'üna commembra dal consistori
Reelecziun d'üna commembra dal consistori
Elecziun d'üna delegada al Colloqui
9. Orientaziuns
10. Varia e coral final 41

Bivgnaint da la presidenta Meditaziun e coral 12

La presidenta Gabriela Angelini dà il bivgnaint a las votantas ed ils votants. Ella surdà il pled a nos ravarenda, Patrick Brand, per üna cuorta meditaziun.

Quel piglia il pled, però nu fa la meditaziun previssa ed üsitada, d'impersè dà sclerimaints suot il titel «Cumgià ed ingrazchamaint». In quels manzuna el cha sia demischiun saja definitiva e ch'el nu fetscha quint da revochar quella. Implü prova el a dar üna invista i'ls impissamaints chi til han manà a sia decisiun.

A la fin da la meditaziun chi nun es statta ingüna meditaziun, vain listess chantà da la raspada da radunanza il coral 12.

1. Tscherna da duos scruttinaduors

Sco scruttinadura vain tschernüda Natalia Florin Roner

2. Protocol da la radunanza generala dals 18 avrigl 2018

Il protocol nu vain plü prelet el es stat expost. Il protocol vain fat bun sco expost sainza cuntravusch.

3. Rapport annual da la presidenta 2017

La radunanza piglia cogniziun dal rapport da la presidenta. La presidenta Gabriela Angelini-Luzi prelegia seis rapport annual, e cumainza quel cun las cifras da las casualias d'ürant l'on scuors:

(i segua il rapport original)

6 battaisems (3 mats, 3 mattas)

6 confirmaziuns (4 mats, 2 mattas)

3 nozzas

14 furnerals

Dürant l'on 2018 vain elavurà diversas robas avertas. Per pudair far ün nouv quadern da lavur per la plazza da ravarenda d'eira Patrick landervia da ramassar indicaziuns sur da sia lavur.

In marz lura ha cumanzà la lavur per la votumaziun da la baselgia chantunala als 10 da gün. In mia funcziun vaiv'eu cret cha quai vegn organisà e tramiss davent da Cuaira e cha nus vain da dar inavant „be“ la glista d'adressas da nos commembers.

Quai d'eira in mincha cas sbaglià. Tuot la lavur es restada aint ils singuls cumüns, la baselgia chantunala ha be furni la documainta. Id es statta nossa lavur da crear üna carta da legitimaziun, da pisserar cha las güstas adressas rivan lassura, da paquetar las bundant 800 bustas e da trametter in chasada, rizzar aint üna chartera ufficiala, tour incunter las bustas e dombrar oura las vuschs d'ürant la fin d'eivna da votumaziun. Causa chi d'eira eir amo elecziuns chantunalas hana savü douvrar a nus eir amo sco dombravuschs per quai. Ün temp intensiv.

In l'istess temp vain sco manzunà già in l'ultima radunanza generala survgni la desditta dals fittadins da l'abitaziun da pravenda a Lavin. Causa l'occuraziun datta vain fat in l'abitaziuns diversas sanaziuns chi faivan dabsögn. La coordinaziun da las lavurs fattas da 5 differentas firmas ha chaschunà magara traffic tanter Zernez e Lavin. Quistas lavurs sun gnüdas a fin la fin da lügl. Tour gio l'abitaziun, scriver oura ella, tsherner il nouv fittadin e scriver ün nouv contrat da fittanza han fat eir our da quist punct ün bun po lavur. La lavur da giuventüna ha chaschunà lavur precis fin quel mumaint cha vain comunicà al cumün dad esser pronts da surtour nossa part da cuosts per 2 ons. Daspö la, fin hoz nu vain dudi plü inguotta.

Ushè d'eira passà il temp plü svelt sco cret.

In nossa sezzüda dal settember es stat sül program da far üna gruppa da lavur per elavurar ün nouv quadern da lavur per la plazza da ravarenda. In quista sezzüda n'ha eu infuormà da na star a disposiziun per quista lavur causa grondas differenzas da vista tanter pêr. Sco affarista e cun meis pensar nu d'eir eu brichafat na adattada per quista lavur. In vezzand cha quistas differenzas nu vegnan al main d'imperse as augmaintan in ün möd na acceptabel n'ha eu in quist mumaint eir comunicà da vulair dar gio mia carica sco presidenta a la fin da l'on curraint. Quai eir aint illa spranza cha la situaziun as po calmar. La gruppa da lavur ha tut sù sia lavur ed ha elavurà pass per pass in vista d'ün nouv quadern da lavur.

Principi october lura es Patrick gnü scrit per ün'eivna 50% amalà cun la comunicaziun cha quai sarà da d'ürada. Il consistori ha sün quai adattà il plan da predgias da nov fin schner, quai cha vaivat sgüra remarchà. Impü ha il consistori surtut da Patrick las lavurs administrativas sco eir las visitas d'anniversari. Ün attestat da meidi nu vain plü survgni. La fin da schner lura, sco cha vus savais es gnüda la desditta da Patrick.

La lavur aint il consistori es ida inavant e nus vain pudü suottascriber il contrat cul cumün resguardand ils sunteris ed ils cluchers als 6 da November.

Eir quist on vain gnü bleras agüdontas ed blers agüdonts ch'ins han güdats da far nossas differentas lavurs in raspada. Il Di da schoppa, Di d'urazchun, Confirmaziun, Culazchun da pasqua, pulir las baselgias....a tuots chi han güdà in ün o l'oter möd vules da cour ingrazchar pel sustegn. Ün grazcha fich va eir a nos culuosters chi fan üna buna ed importanta lavur davo las culissas.

Gugent vules in quist'occuraziun ingrazchar eir a meis amis dal consistori per Lur sustegn per part d'ürant blers ons, vules ingrazchar eir a la raspada per tuot ils bels inscunters, las allegraivlas baderladas saja quai sün via obain eir aint il Coop e pel sustegn in general ch'eu n'ha pudü badair in diversas occasiuns.

4. Deliberaziun d'ün credit per l'abitaziun a Lavin (da fr. 45'700.00)

La presidenta, Gabriela Angelini-Luzi orientescha a la radunanza davart la fatschenda. A la radunanza generala da l'on passà vaiva ella rendü attent da la desditta dals fittadins da l'abitaziun ed eir dal fat chi varan da gnir fattas investiziuns remarchablas per metter l'abitaziun darcheu in ün bun stadi. Ella dà üna survista detagliada da las lavuors chi sun gnüdas fattas surtuot in chadafö ed i'l bogn ed eir amo vi da fuonds, fanestras ed oter plü. Implü dà ella üna survista dals differents quintes da la manseteranza. Tuot in tuot importan

quels in summa fr. 44'924.00. Sainza far adöver da la discussiun, fa la radunanza bun il credit cun unanimità da vuschs.

5. Rendaquint e rapport dals revisuors da quint

Claudia Duschletta preschainta il quint da gestiun ed il bilantsch per l'on 2018 e declera divers detagls. Il quint da gestiun da la raspada serra cun ün guadogn da fr. 1211.82. Cuosts ha chaschunà d'ürant l'on scuors surtuot la renovaziun da l'abitaziun a Lavin, per ils quals la radunanza ha acconsenti il credit posterieur suot tractanda 4.

La facultà nouva da la raspada as summa per la fin da l'on 2018 a fr. 964'045.61 inclusiv contos specials.

La revisura Lucrezia Schorta-Thom legia avant il rapport dals revisuors da quint. Seis duos collegas chi han fat cun ella la revisiun, Arno Felix er Ricardo Weingard, s'han s-chüsats per quista saira. Il rapport constata cha tuot es in bun uorden e tenor las pretaisas. Quel propuona per finir dad approvar il quint e da dar dis-charg als organs respunsabels. La radunanza segua a quella proposta sainza cuntravusch.

6. Fixar il pè d'imposta da la baselgia pel 2020

La proposta dal consistori es quella da laschar il pè d'imposta sco fin qua, pro 18.5% da l'imposta simpla dal Chantun Grischun. Quel as metta insembel da 15% imposta da baselgia per la raspada e 3.5% imposta per l'egualisaziun chantunala. La proposta vain approvada da la radunanza cun unanimità da vuschs.

7. Preventiv 2019

Claudia Duschletta preschainta il preventiv pel 2019, e sta a dispusiziun per dumondas. Il preventiv chi prevezza per l'on 2019 ün pitschen gudogn vain approvà unanim.

8. Tschernas:

- *Elecziun d'ün president*

Davo cha la presidenta Gabriela Angelini-Luzi vaiva fingià la fin d'avuost annunzchà al consistori sia demischiun, s'ha miss il suotsegnà, Hermann Thom, a disposiziun per la tscherna.

El vain elet da la radunanza cun unanimità da vuschs e cun applaus.

- *Reelecziun dad üna commembra dal consistori*

Avant trais ons davu la fusiun da nossa raspada, d'eira insembel cun la presidenta scadenta ed il nouvelet president gnüda tschernüda eir Ottilia Godly sco commembra dal consistori. Ella as metta a disposiziun per üna ulteriura perioda d'uffizi da trais ons.

Ella vain reeleta da la radunanza cun unanimità da vuschs e cun applaus.

- *Elecziun d'üna nouva commembra dal consistori*

Il consistori ha tscherchà candidats e cadidatas ed ha chattà a Natalia Florin Roner da Zernez chi as metta a disposiziun per quist post.

Eir ella vain eleta da la radunanza cun unanimità da vuschs e cun applaus.

- *Elecziun da la delegada al Colloqui*

Fin qua d'eira la presidenta automaticamaing eir delegada al Colloqui d'Engiadina Bassa e Val Müstair. Suvent gniva ella rimplazzada in quel gremi dad Ottilia Godly. Il president nouvelet fa inamöd part al Colloqui, causa ch'el es commember dal Grond cussagl evangelic. Perquai propuona il consistori dad elegier ad Ottilia Godly, quai cha la radunanza fa cun unanimità da vuschs.

9. Orientaziuns

La presidenta orientescha cha üna cuvegna da drets da passagi chi d'eira gnüda impromissa l'on passà in connex culla surdatta da sunteris e cluchers al cumün politic nun es intant amo gnüda stipulada. Uschè sarà quai üna fatschenda, sur da la quala la radunanza da l'on chi vain varà da decider.

Ün'otra cuvegna es invezza fatta e pajada. I's tratta d'üna cuvegna cun la Swisscom in connex culla fabrica da la staziun nouva da Sagliains-Crusch. Là posseda la corporaziun

ün prà e suot quel aint es gnüda realisada üna vasca da cruschada ed attach da lingias da telefon. Pel dret da passagi per lingias inclusiv vasca ha la corporaziun survgni ün import da fr. 333.00.

Oramai cha la chasa pravenda nu sarà abitada d'ürant ün temp quista stà, d'essan gnir fattas renovaziuns ill'abitaziun dal ravarenda d'ürant quel temp. La corporaziun ha gnü in quel regard prüms contacts cun las instanzas politicas dal cumün.

In nossa raspada esa tradiziun cha onurificaziuns da persunas chi accomplischan lur carica fingià d'ürant ün temp da giubileum, vegnan onurats in occasiun da la tractanda „Orientaziuns“.

Quist on es quai nossa organista Christa Pinggera chi vain onurificada e survain ün regal per seis 35 ons servezzan. Ella es e resta üna pozza fidada e flexibla per cults divins e casualias ed ha survgni sper il regalin eir ün grond applaus da la radunanza.

La seguonda chi ha pudü tour incunter ün regal es la presidenta scadenta. Ella po eir verer inavo sün üna lunga fasa cun ün ingaschaint instancabel per nossa raspada. Ottilia surdà ad ella ün regal ed exprima ün sincer grazcha fich davart dal consistori, ma eir in nom da la raspada. Quel vain sustgnü d'ün appaus da la radunanza.

10. Varia e coral final

La presidenta, Gabriela Angelini, driva la tractanda varia:

- Ulrica Guidon-Bisenz piglia il pled per far ün per remarchas arreguard quai chi tenor ella nu para dad esser gratià d'ürant l'on scuors uschè bain. Ella es da l'avis cha la comunicaziun persunala tanter pèr saja per ün ravarenda ed ün consistori qualchosa indispensabel ed important. Ella as dumonda perquai schi nu van da la jadas las chossas suotsura causa cha hoz as scriva be amo mails invezza da discuorrer ün cun l'oter. Ella remarcha cha illa raspada nu's po savair tuot quai chi'd es i suotsura da maniera chi saja gnü a demischiuns, ma ella voul in quist lö exprimer chi fa malavita a stuvair verer chi nu va tuot co chi stess, e chi pudess ir tuot eir bler meglder. Ella loda a la fin surtuot a ravarenda Patrick Brand pel plaschair ch'el ha fat d'ürant ils ultims ons a la raspada. Per exaimpel cun imprender svelto rumantsch e dvantar ün da nus. Ella ingrazcha culs plects in dialect bernais: «u dä no merci».
- Jack Pinggera s'indreschischa davart la pussibilità dad installar ün secretariat per nossa raspada. Avant ons as vaiva d'ürant ün temp gnü ün tal cullas raspadas vaschinas giò per val. Quai dess dis-charg al ravarenda ed a la suprastanza. I'l rom da la reorganisaziun da la pravenda es daspö ils 1. da favrer installà ün secretariat ad interim. E cun gronda probabltà scha las experienzas muossan chi fa sen, esa previs cha quel vain lura in occasiun da l'organisaziun da collavuraziun cun ün nouv ravarenda, stabili definitivamaing.
- Richard Pfeiffer giavüscha cha illa Baselgia San Bastian vegna installà ün sistem d'amplifichadurs sco cha nus vain illa baselgia da Susch. La as doda fich bain las predgias, intant cha in Baselgia San Bastian nun es quai brichafat il cas. Il consistori piglia incunter quel giavüsche e s'occupa dal tema.
- Fritz Felix propuona da far üna tabla d'inscripziun pel sainet istoric chi'd es exposc i'l clucher da la baselgia da Susch. Eir quist giavüsche vain tunt incunter ed elavurà dal consistori.

La radunanza po gnir serrada a las 21.45

Davo avoir chantà il coral final, po la radunanza star da cumpagnia per ün apero.

La presidenta:

L'actuar:

Approvà als